

***PREZENTACIJA REALIZOVANIH PROJEKATA
OPĆINE STARI GRAD SARAJEVO
U 2021.GODINI***

Uvod

Općina Stari Grad Sarajevo, predvođena općinskim načelnikom mr Ibrahimom Hadžibajrićem, uspješno je završila još jednu poslovnu godinu koju je obilježila realizacija značajnih projekata usmjerenih u stvaranje što ugodnijeg okruženja za život i rad naših građana. Među prvima je rekonstrukcija Vrtića "Bulbuli", milionski projekat koji je završen u maju 2021.godine. Među najvišim investicijama u 2021. godini je i rekonstrukcija kanalicione i vodovodne mreže na Alifakovcu u koju je također uloženo više od 1,4 miliona konvertibilnih maraka.

Radilo se i na poboljšanju infrastrukture i sadržaja za odmor i relaksaciju, te je uspješno realizovan projekat rekonstrukcije lokalne saobraćajnice Dariva- Kozija ćuprija gdje je također po prvi put uvedena i javna rasvjeta. Modernu LED rasvjetu 2021. godine dobila je i ulica Ferhadija.

U toku 2021. godine sanirano je 14 ulica, isto toliko potpornih zidova, te 31 stambena jedinica socijalno ugroženih građana.

Istovremeno, uključili smo se u projekte koji su bili neophodni našoj lokalnoj zajednici za pružanje što boljih usluga našim građanima. U Starom Gradu je otvoren prvi Punkt Hitne pomoći, kao i prvi Restoran Dobre volje, Udruženja Pomozi.ba kojima smo dodijelili naše prostorije.

Posebno smo ponosni što smo u prošloj godini povećali sredstva za pomoć mladim ljudima i ugroženim kategorijama za samozapošljavanje i pokretanje vlastitih biznisa. Devet korisnika sa održivim i kvalitetnim idejama dobilo je nepovratna sredstva u iznosu od 70.000 KM.

Ponosni smo i na jako dobre prijateljske veze koje održavamo sa našim pobratimskim općinama širom svijeta. Te veze izrodile su još jednom saradnjom. Općina Fatih iz Istanbula odlučila je donirati sredstva u iznosu od 360.000 KM za sanaciju Trga oslobođenja- Alija Izetbegović. Ovaj projekat bit će nastavljen čim to vremenske prilike dozvole.

Za nas je 2021. godina počela značajnim priznanjem koje je u februaru 2021.pripalo općinskom načelniku mr Ibrahimu Hadžibajriću, a to je Jubilarna nagrada za životno djelo za izvanredne rezultate u razvoju Općine Stari Grad i stvaranje ambijenta za biznis, doprinos afirmaciji općine, kontinuirano ulaganje u infrastrukturu i dugogodišnje prosperitetno vođenje Općine u interesu građana i biznisa. Nagradu mu je dodijelio Evropski nezavisni žiri, sastavljen od uglednih evropskih i svjetskih menadžera, naučnih i javnih radnika, te ranijih dobitnika nagrade sa šireg prostora regiona. Kako je počela, tako je i završila. Kraj 2021. godine Općina Stari Grad Sarajevo krunisala je priznanjem za najtransparentniju jedinicu lokalne samouprave u BiH, u ispitivanju otvorenosti i transparentnosti JLS od strane Udruženja građana ZaštoNe i inicijative Istinomjer. Ovo priznanje pripalo je Općini Stari Grad četvrtu godinu zaredom.

Projekti izgradnje, obnove i razvoja Starog Grada u 2021. godini

U toku 2021. godine realizovali smo brojne značajne projekte, sami ili u saradnji sa partnerima. Ti projekti omogućili su mnogo bolje uslove i pružanje usluga za naše građane, a realizovani su u različitim sferama života: infrastruktura, socijalna skrb, odgoj, obrazovanje i drugo.



Rekonstruisan Vrtić „Bulbuli“

Na Bistriku je 02. maja svečano najavljen završetak rekonstrukcije vrtića „Bulbuli“. U potpunosti je obnovljen objekat ukupne površine skoro 400m², urađeni svi građevinski radovi u unutrašnjosti, na krovnoj konstrukciji, montiran solarni sistem, uvedeno podno grijanje, postavljene nove elektroinstalacije i hidroizolacija, izgrađeno novo dječije igralište. Ovaj objekat je bio potpuno devastiran i neupotrebljiv još iz vremena agresije na naš grad i zemlju. Projekat su realizovali Općina Stari Grad i Ministarstvo za odgoj i obrazovanje KS, a investicija je koštala oko 964.000 KM.



Vrtić Bulbuli prije i sad




Milionski infrastrukturni projekat na Alifakovcu

JZavršena je rekonstrukcija kanalizacione i vodovodne mreže u dijelu ulice Veliki Alifakovac i ulicama Alifakovac, Maguda i Megara i preostalo je još asfaltiranje dionica na kojima su se izvodili radovi, a što će biti realizovano čim se steknu uslovi. Vrijednost ovog projekat je 1.444.800 KM, a njegovom realizacijom će se poboljšati funkcionalnost, olakšati eksploatacija i što je najbitnije, smanjiće se gubici vode u nekoliko naselja. Brojna domaćinstva u ovim ulicama dobila su nove priključke na vodovodnu i kanalizacionu mrežu nakon što su zamijenjeni glavni vodovi koji nisu sanirani više od 70 godina. Na ovaj način je nastavljeno rješavanje komunalne infrastrukture što je jedan od gorućih problema građana Starog Grada.



Rekonstrukcija ulice Hamdije Kreševljakovića

I ovaj projekat vrijedan je stotine hiljada konvertibilnih maraka, a njegova realizacija trajala je duže od planiranog zbog nepredviđenih radova koji su iskrslili tokom projekta. Do sada je završena sanacija na dionici od Drvenije do raskrsnice prema trolejbuskom stajalištu na Trgu Austrije. Time je završen jedan dio ovog kompleksnog i velikog projekta. Također, urađena je i sanacija dva dijela armirano-betonske stropne ploče Bistričkog potoka koji protiče ispod dijela saobraćajnice a na kome su evidentirana oštećenja tokom radova, te je nanesen prvi sloj asfalta i ponovo uspostavljen trolejbuski saobraćaj. U finansiranje radova sanacije stropne ploče uključila se i Gradska uprava Grada Sarajeva, a inače implementator projekta je Direkcija za ceste KS. Projekat obuhvata dionicu od Drvenije do Austrijskog trga, ukupne dužine oko 450 metara, kao i trolejbusku okretnicu dužine cca 200 metara, a njegova vrijednost je (bez troškova sanacije stropne ploče) oko 750.000 KM. Radovi će biti finalizirani čim se steknu vremenski uslovi za nastavak.



Više od pola miliona maraka za novu kanalizaciju na Mahmutovcu

U junu 2021. godine na Mahmutovcu je završen veliki projekat uvođenja nove kanalizacije i vodovodne mreže u ulicama Kamenica i Paje malta koji je označio kraj dugogodišnjih problema stanovnika ovog starogradskog naselja. Godinama unazad ovi građani su imali problem loše kanalizacione mreže, odvoda otpadnih voda i neadekvatnih kućnih priključaka. Projekat je koštao oko 600.000 KM. Postavljeno je više od 600 metara novih kanalizacionih cijevi za oborinsku i fekalnu kanalizaciju, te više od 200 metara novih vodovodnih cijevi. Sva domaćinstva dobila su priključke, a neka od njih su po prvi put regulisala kanalizacionu odvodnju na propisan način.

Inače, na ovom velikom projektu radilo se tri godine i nove instalacije postavljene su kroz tri mjesne zajednice: Bistrik, Toka-Džeka i Mahmutovac, odnosno ulice: Kurtin sokak, Begovac, Paje, Paje sokak, Berkuša velika, Berkuša mala, Kamenica i Paje malta. Cijeli projekat koštao je skoro dva miliona maraka



Sanacija Trga oslobođenja-Alija Izetbegović

Veliki projekat sanacije centralnog gradskog trga - Trga oslobođenja-Alija Izetbegović, počeo je 04.augusta 2021. godine. Već sredinom istog mjeseca radovi su obustavljeni nalogom federalnog inspektora koji je postupao po prijavi Komisije za očuvanje nacionalnih spomenika BiH. U prethodnom periodu intenzivno se radilo na iznalaženju zajedničkog rješenja. Općinski načelnik mr Ibrahim Hadžibajrić i predsjednik Komisije za očuvanje nacionalnih spomenika BiH Faruk Kapidžić, kao i predstavnici nadležnih službi Općine Stari Grad Sarajevo, Komisije i Federalnog ministarstva prostornog uređenja održali su niz sastanaka na ovu temu. Općina je, prema smjernicama Komisije za očuvanje nacionalnih spomenika BiH, pristupila izradi novog projekta za uređenje Trga oslobođenja-Alija Izetbegović, te je postignut dogovor i Komisija za očuvanje nacionalnih spomenika BiH dala je pozitivno mišljenje na projekat. Projekat je upućen Federalnom ministarstvu prostornog uređenja gdje također očekujemo pozitivan ishod. Radovi bi ubrzo trebali biti nastavljeni. Inače, projekat se realizuje zahvaljujući pobratimskim odnosima Općine Stari Grad i turske Općine Fatih, a na osnovu dogovora i prijateljske saradnje načelnika ovih općina Ibrahima Hadžibajrića i Mehmeta Ergüna Turana. Općina Fatih finansira radove iznosom od 310.000 KM.



Sanirana i osvijetljena dionica Dariva – Kozija ćuprija

U novembru 2021. godine je uspješno realizovan zajednički projekat Općine Stari Grad i Gradske uprave Grada Sarajevo - sanacija lokalne saobraćajnice Dariva-Kozija ćuprija, vrijedan 316.116 KM. Projektom je - od mosta na Darivi do Kozije ćuprije na saobraćajnici dugoj 1.600 metara urađena kompletna sanacija sa asfaltiranjem, a saniran je i pristupni put i plato na Darivi. Kompletna dionica, od Bentbaše do Kozije ćuprije pokrivena je modernom LED rasvjetom, a uvođenje na dionici od Darive do Kozije ćuprije realizovano je krajem augusta ove godine. Na dionici od Bentbaše do Darive ova rasvjeta uvedena je još 2018. godine, a šetalište je pokriveno i video nadzorom instaliranim na tri ulaza: na Bentbaši, Darivi (Park prijateljstva) i na Kozijoj ćupriji.



Uređenje korita i obala rijeke Miljacke

Zahvaljujući preventivnom djelovanju i čišćenju korita i obala rijeke Miljacke, na dijelu od bazena Bentbaša do ušća Moščanice, općina Stari Grad nije imala problema sa izljevanjem Miljacke za vrijeme obilnih padavina početkom novembra ove godine. Radi se o projektu na dionici dugoj oko 1.400 metara koji je nažalost zaustavljen zbog loših vremenskih prilika, ali će biti nastavljen čim se steknu uslovi. Na kompletnom potezu radi se sječenje šiblja i niskog rastinja, trave, okresivanje grana stabala koja se nalaze uz riječno korito, a nakon toga uslijedit će uklanjanje nataloženih materijala i mulja iz korita rijeke. Vrijednost radova na čišćenju korita Miljacke je 67.860 KM. Sredstva u iznosu od 50.000 KM obezbijedena su na osnovu Sporazuma o sufinansiranju projekata regulacije vodotoka potpisanog između Općine Stari Grad Sarajevo, Ministarstva privrede KS i Zavoda za izgradnju KS. Ostatak potrebnih sredstava u iznosu od 17.860 KM osiguran je iz budžeta Općine Stari Grad za 2021. godinu, namijenjenih za preventivne mjere. Radovi će biti nastavljeni čim se steknu vremenski uslovi



Moderna LED rasvjeta u Ferhadiji

U ulici Ferhadija uvedena je nova pametna javna rasvjeta, bazirana na rasvjetnoj mreži ili baldahinu (lighting grid or canopy) koja osim svjetla sadrži i informacijsko-komunikacijske tehnologije, obješena na sistemu sajli visoko iznad ulice. Novi sistem javne LED rasvjete uveden je na potezu od ulice Titova, kroz Ferhadiju, do ulice Sarači. Vlada Kraljevine Švedske putem UNDP BiH je implementator projekta u saradnji sa Ministarstvom komunalne privrede, infrastrukture, prostornog uređenja, građenja i zaštite okoliša KS koji su zajedno za projekat izdvojili oko 400.000 KM. Općina Stari Grad je osigurala potrebnu dokumentaciju za početak radova na cijeloj trasi, odnosno neophodne saglasnosti kako za radove u ulici Titova – koja pripada Općini Centar, tako i u ulici Ferhadija koja se nalazi u obje općine.



Otvoren prvi Punkt Hitne pomoći

Krajem augusta 2021. godine, u općini Stari Grad otvoren je prvi punkt Hitne medicinske pomoći koji je na raspolaganju građanima 24 sata, a nalazi se u neposrednoj blizini zgrade Općine Stari Grad, te ima osiguran ulaz iz ulice Tekija čikma, kao i iz ulice Obala Kulina bana 24. Punkt je otvoren uz zalaganje općinskog načelnika mr Ibrahima Hadžibajrića kako bi građani imali bržu i efikasniju uslugu, a što se nastojalo postići i u prethodnim godinama. Međutim, nije postojala politička volja. Konačno je punkt otvoren ove godine, a Općina Stari Grad ustupila je za te potrebe svoje poslovne prostorije i finansirala iznosom od 20.000 KM njihovu adaptaciju.



Restoran Dobre volje i Edukacioni centar – Pomozi.ba

U Starom Gradu je otvoren prvi Restoran Dobre volje Udruženja Pomozi.ba koji dnevno nahrani do 250 socijalno ugroženih osoba. Prostorije za rad restorana dodijelila je Općina Stari Grad, na lokaciji Mula Mustafe Bašeskije – preko puta Gradske tržnice. Nakon toga, udruženju su dodijeljene i dodatne prostorije za pokretanje Edukacionog centra za djecu i za odrasle. Centar će nuditi neformalno obrazovanje: informatiku, strane jezike i drugo.



Sanacija dvorišta Gazi Husrev-begove medrese

Dvorište Gazi Husrev-begove medrese, jedne od najstarijih obrazovnih institucija u Evropi osnovane prije 484 godine, u julu 2021. godine je u potpunosti obnovljeno. Ovaj projekt omogućili su Općina Stari Grad i općinski načelnik mr Ibrahim Hadžibajrić koji je u budžetu ove lokalne samouprave u dva navrata planirao namjenska sredstva za radove rekonstrukcije dvorišta, ali i izgradnje spomen-obilježja poginulim imamima za vrijeme agresije na BiH 1992-1995, koje se također nalazi u ovom dvorištu. Projekti rekonstrukcije dvorišta Gazi Husrev-begove medrese i izgradnje spomen obilježja poginulim imamima za vrijeme agresije na BiH 1992-1995, koštali su oko 180.000 KM i u potpunosti su finansirani iz budžeta Općine Stari Grad.



Biblioteka za slijepa i slabovidna lica

Više od 30.000 bibliotečkih jedinica koje čuva Biblioteka za slijepa i slabovidna lica BiH sada su smještene u uslovnijim prostorijama zahvaljujući projektu postavljanja nove stolarije u ovoj ustanovi koja nije bila promijenjena više od 40 godina. Urađen je projekat zamjene kompletne stolarije u prizemlju objekta i galeriji. Nakon demontaže starih drvenih prozora, postavljeno je 16 novih prozora.



Sanacija stambenih jedinica socijalno ugroženih

Odlukom općinskog načelnika mr Ibrahima Hadžibajrića u 2021. godini pružena je pomoć u sanaciji stambenih jedinica za ukupno 31 socijalno ugroženu porodicu kojima je na ovaj način riješeno jedno od životnih pitanja. Iz budžeta Općine Stari Grad finansirana je sanacija 18 stambenih jedinica na kojima je radove izveo izabrani izvođač, dok je još 13 porodica dobilo građevinski materijal za neophodne radove na svojim kućama. Za ove namjene je iz budžeta Općine Stari Grad u 2021. godini izdvojeno 120.000 KM. Rađene su sanacije krovova, zamjena unutarnje i vanjske stolarije, mokrih čvorova, fasada itd osobama koje nisu u mogućnosti sami finansirati ove radove, a kako bi im se obezbijedio krov nad glavom.





Sanacija ulica i potpornih zidova

Na području općine Stari Grad i 2021. godine aktivno se nastavila sanacija putne i komunalne infrastrukture, te je u proteklih 12 mjeseci sanirano 18 ulica i 14 potpornih zidova.



Kamenica i Paje malta

Po završetku rekonstrukcije kanalizacije i vodovodne mreže u dijelovima ulica Kamenica i Paje malta izvršeno je njihovo asfaltiranje.




Braće Nuhić

Sanirano je i asfaltirano 190 metara ulice, radovi su koštali 64.700 KM.



Kečina

Saniran je i asfaltiran dio ove ulice, dužine oko 235 metara. Radovi su koštali 78.200 KM.



Hamdije Kreševljakovića

Sanirana je i asfaltirana dionica od Drvenije do raskrsnice prema trolejbuskom stajalištu Trgu Austrije. Ukupna dužina dionice koja se radi je 650 metara, na saobraćajnici Trg Austrije kod trolejbuske okretaljke, nanesen je prvi sloj asfalta, radovi će se nastaviti.



Dariva-Hreša

Asfaltirano je 170 metara saobraćajnice na regionalnoj cesti R447 Dariva – Hreša. Projekat je koštao oko 215.000 KM.



Nadmejdán

Skinuta je stara, dotrajala i oštećena kocka na saobraćajnici i trotoarima, te izvršeno asfaltiranje u dužini oko 120 metara, vrijednost radova 50.000 KM.




Za beglukom

I u ovoj ulici je skinuta stara i oštećena kocka na saobraćajnici i trotoarima, te izvršeno asfaltiranje u dužini oko 120 metara, vrijednost radova 50.000 KM.



Bjelavica

Sanirano je i asfaltirano 115 metara ulice, projekat je koštao oko 34.500 KM.



Dariva – Kozija ćuprija

Na saobraćajnici - od mosta na Darivi do Kozije ćuprije dugoj 1.600 metara, urađena je kompletna sanacija sa asfaltiranjem i saniran je pristupni put i plato na Darivi. Projekat je koštao 316.116 KM.



Gornje Biosko

Završena je prva faza rekonstrukcije putne komunikacije u naselju Gornje Biosko. Sanirano je oko 200 metara puta, a projekat je koštao oko 20.800 KM.



Mošćanica čikma i Čorbadži dede Mustafage – dio kanalizacione mreže

Na inicijativu predstavnika nekoliko domaćinstava iz ovih ulica, Općina Stari Grad se uključila u rješavanje problema nedostatka dijela kanalizacione mreže tako što je obezbijedila materijal; cijevi za dionicu dužine 250 metara, spojnice, račve, betonske poklopce i ostali neophodni materijal. Građani su se uključili u izvođenje radova, te je tako riješen problem kanalizacionih odvoda za čak 30 domaćinstava ovih ulica, uključujući i Džamiju Obhodža.



Iza bašče broj 10

Sanacija 14 potpornih zidova

Izgrađeno je i sanirano 13 potpornih zidova: Ramića banja broj 19, Josipa Šadlera broj 15, Saburina broj 5, Grličića brdo od broja 61 do broja 65, Hamdije Kreševljakovića broj 98a, Iza bašče broj 10, Jarčedoli broj 40, Krka, Braće Nuhić (četiri zida u sklopu sanacije ulice) i Kamenica (dva zida u sklopu sanacije rekonstrukcije kanalizacione i vodovodne mreže u ulicama Kamenica i Paje malta). Prvih osam zidova koštali su oko 180.000 KM, dok je preostalih šest zidova rađeno u sklopu drugih projekata koji su koštali oko 665.000 KM




Jarčedoli broj 40



Gričiča brdo od broja 61 do broja 65



Josipa Štadlera broj 15



Nova kaldrma na Bistriku



Sanirana kaldrma u ulici Save Skarića

Sanacija kaldrma

U 2021. godini urađena je sanacija kaldrma u ulicama, Bistrik donja čikma i Save Skarića, te sanacija kaldrmisane lijeve strane trotoara u ulici Kovači-Ploča. Vrijednost svih radova je oko 94.000 KM. Općina Stari Grad već godinama, putem nadležnih službi, ulaže značajna finansijska sredstva u očuvanje autentičnog izgleda svojih ulica, a kaldrmisana stepeništa i trotoari u mahalama predstavljaju ono po čemu je prepoznatljiv Stari Grad.

Podrška vjerskim zajednicama

Više od 100.000 KM u 2021. godini izdvojeno je iz budžeta Općine Stari Grad za podršku vjerskim zajednicama i ustanovama, a najvećim dijelom je finansirana njihova obnova i gradnja.



Obnova fasade Vrhbosanskog bogoslovnog sjemeništa

Izdvojeno je 42.000 konvertibilnih maraka za sufinansiranje sanacije zapadnog dijela fasade Vrhbosanskog bogoslovnog sjemeništa. Objekat na kojem se izvode radovi proglašen je nacionalnim spomenikom BiH, te se podrškom ovoj rekonstrukciji nastavlja i zaštita kulturno-historijskih spomenika u najstarijoj općini.



Sanacija stepeništa za zvonik Crkve Svetog Ante na Bistriku

Finansirana je sanacija stepeništa koje vodi do zvonika Crkve Svetog Ante na Bistriku u ulici Franjevačka. Ovo su prvi radovi ikad na crkvenom zvoniku, koji je dovršen 1913. godine, a od tada se na njemu ništa nije radilo. Iz budžeta Općine Stari Grad izdvojeno je 30.000 konvertibilnih maraka.



Dugogodišnja podrška radu Fonda Memorijala KS

Općina Stari Grad svake godine izdvaja finansijska sredstva za nesmetan rad i funkcionisanje Javne ustanove Fond Memorijala Kantona Sarajevo. Od 2009.godine do danas ta podrška iznosi više od pola miliona maraka, a u ovogodišnjem budžetu izdvojena su sredstva u iznosu od 25.000 KM. Sredstva koja izdvaja Općina Stari Grad usmjeravaju se u sanaciju i održavanje mezarja.



Sufinansiranje sanacije fasade Lubine džamije

Lubina džamija, jedna od najstarijih u Sarajevu, pretrpjela je velike štete i devastaciju tokom agresije na našu zemlju, a potpuno je renovirana 1997. godine. Međutim, od tada je prošlo dosta vremena te su na džamiji nastupila nova oštećenja. Polovinom prošle godine počeli su veći radovi na renoviranju i adaptaciji, a projekat obuhvata unutarnje i vanjske radove. Općina Stari Grad je izdvojila 4000 konvertibilnih maraka za sanaciju opadanja dijelova fasade, pucanja unutarnjih zidova, a riješen je i problem vlage.





Ostali projekti iz oblasti infrastrukture

Prema podacima Službe za investicije i komunalne poslove Općine Stari Grad i 2021. godine su značajna finansijska sredstva izdvojena za projekte iz oblasti djelovanja ove službe, a tiču se zimskog održavanja, uvođenja nove signalizacije, uređenje javnih površina i slično. Za zimsko održavanje ulica iz budžeta je izdvojeno oko 150.000 KM. Za ugradnju novih rukohvata, odbojnih ograda, niša, horizontalnu i vertikalnu signalizaciju, numeraciju i slivne rešetke izdvojeno je oko 62.000 KM. Za uređenje Aleje ambasadora, javnih površina i sanaciju šetnica izdvojeno je oko 65.500 KM. Za nabavku kanti za dvolinijski sistem odvoza smeća izdvojeno je 62.500 KM.



Podrška samozapošljavanju, poljoprivrednicima, osobama treće životne dobi..

Devet mladih dobilo nepovratna sredstva za poticaj samozapošljavanju

U vremenu kada veliki broj mladih ljudi odlučuje da napusti našu zemlju i potrazi za boljim životom, od velikog je značaja pružiti im podršku i finansijski poticaj da svoje poslovne ideje razvijaju ovdje, u svojim matičnim općinama i svojoj domovini. U 2021. godini dali smo šansu da devet mladih ljudi pokrene svoje poslovne planove. U augustu ove godine načelnik Hadžibajrić potpisao je ugovore sa novim korisnicima, a ukupno je za njihove poslovne ideje izdvojeno 65.000 KM. Evo ko su oni:

- **Senad Džindić** - Studio za trening, rehabilitaciju i psihološku podršku
- **Sanja Kulenović** - Studio za grafički i industrijski dizajn
- **Fatima Fazlović** - Proizvodnja i prodaja bosanskih slastica
- **Aida Alihodžić** - Računovodstvene, knjigovodstvene i revizijske djelatnosti
- **Vedad Hrković** - Održavanje i pranje vozila
- **Amina Maglajlija** - Proizvodnja i prodaja svećanih i unikatnih haljina
- **Andrea Mirković** - Proizvodnja i prodaja zdravih sokova
- **Šahin Kapo** - Izrada fotografija na kanvas platnu
- **Fata Musić** - Izrada i prodaja suvenira



Podrška poljoprivrednicima i stočarima

U 2021. godini ukupno je građanima dodijeljen 21 plastenik sa pratećom opremom i sadnicama, te podsticaj za pčelarstvo kao i nabavku mehanizacije.



Dodijeljeno 15 plastenika po javnom pozivu

Zahvaljujući podršci svoje lokalne zajednice još 15 stanovnika Starog Grada ove godine počelo se baviti plasteničkom proizvodnjom za što su im osigurani plastenici, prateća oprema i sadni materijal. Za 15 plastenika i sadni materijal koji je podijeljen ove godine, novim i starim korisnicima, iz budžeta je izdvojeno skoro 45.000 KM. Osim toga, poljoprivrednicima koji su aplicirali za sjemenski materijal podijeljeno je 800 kg sjemenskog krompira i 70 kg sjemenskog crnog luka. S ciljem razvoja plasteničke proizvodnje i podrške poljoprivrednicima u Starom Gradu je u posljednjih 13 godina podijeljeno više od 220 plastenika, a za te namjene je izdvojeno skoro pola miliona konvertibilnih maraka.





Općina i NVO „ASB“ dodijelili još šest plastenika

Građanima općine Stari Grad Sarajevo, koji su se odlučili za bavljenje plasteničkom proizvodnjom, u oktobru je dodijeljeno još šest plastenika, čime se ukupni broj korisnika u ovoj godini popeo na 21. Ovih šest plastenika je dio projekta „Socijalno-ekonomska podrška izuzetno ranjivim porodicama i lokalnim pružaocima socijalnih usluga u 16 zajednica u Bosni i Hercegovini“ realizovanog u saradnji sa NVO Arbeiter Samariter Bund (ASB). Projekat većinski finansira Ministarstvo vanjskih poslova Njemačke, dok je Općina Stari Grad osigurala 30% potrebnih sredstava za nabavku, a realizacija se provodila putem Službe za lokalni razvoj i poslove mjesnih zajednica.



Podsticaj za 15 pčelara iz Starog Grada

Odlukom općinskog načelnika ove godine je 15 pčelara iz općine Stari Grad dobilo podsticaje. Inače, projekat se realizuje putem Službe za privredu, a da bi dobili pomoć Općine Stari Grad pčelari su morali ispuniti određene uslove: da imaju mjesto prebivališta i zemljište na području ove općine, kao i uslove potrebne za pčele - da poljoprivredno gazdinstvo koje se bavi ili koje tek počinje sa pčelarenjem ima voćnjak potreban za prinos meda i vodu za pčele, da košnice sa pčelinjim društvima nisu u blizini glavne saobraćajnice i drugo. U posljednjih osam godina skoro 300 građana dobilo je neku vrstu poticaja: pčele, košnice, opremu ili finansijska sredstva za nabavku istih.



Sufinansirana nabavka mehanizacije

Poljoprivrednici u Starom Gradu u 2021. godini mogli su ostvariti pravo i na finansiranje nabavke potrebne mehanizacije. Ovaj program predviđen je planom rada općinskog načelnika mr Ibrahima Hadžibajrića za period od 2020 do 2024. godine i za 2021. godinu je u te namjene utrošeno 20.000 KM. Cilj je pomoći građanima koji se bave poljoprivredom i stočarstvom u osiguravanju vlastite egzistencije, ali i pružiti im mogućnost zarade, te masovnije proizvodnje. Krajem 2021. godine, sredstva za nabavku poljoprivredne mehanizacije dobilo je osam korisnika. Njima je sufinansirana nabavka mušilica, kosačica i motokosačica, motokultivatora, trimera, kopačica i druge mehanizacije za obradu zemlje.

Ovaj podsticaj realizovan je putem općinske Službe za privredu kojoj su građani predavali zahtjeve, a nakon terenskog obilaska svih korisnika koji su predali zahtjeve i za koje je utvrđeno da ispunjavaju uslove. Ugovori su korisnicima sredstava potpisani su početkom decembra, 2021. godine.



Podrška Centru za promociju i unapređenje zdravlja

U junu ove godine, uz zdravstvene vježbe, medicinsko savjetovanje, likovne radionice za najmlađe i najstarije, podjelu brojnih poklona i proglašenje najstarijih i najaktivnijih članova, Centar za promociju i unapređenje zdravlja Općine Stari Grad obilježio je svoju četvrtu godišnjicu uspješnog djelovanja. Centar je zdravstveni servis građana svih generacijskih grupa u okviru kojeg se provode različite zdravstvene i edukativne aktivnosti, a posebna pažnja posvećena je osobama treće životne dobi sa kojima radi tim zdravstvenih profesionalaca. Jedinstven je po tome što prima korisnike iz cijelog Kantona Sarajevo i ima ukupno 732 člana. Za djelovanje Centra za promociju i unapređenje zdravlja općine Stari Grad ove godine izdvojeno je 35.000 KM.



Redovan i besplatan školski prevoz za osnovce

Učenike starogradskih osnovnih škola koji stanuju na većoj udaljenosti od škola i nemaju redovne linije javnog gradskog prevoza, od početka školske godine u njihove učionice vozili su školski autobusi koje su obezbijedili Općina Stari Grad i Ministarstvo saobraćaja Kantona Sarajevo. Ukupno 280 učenika iz osnovnih škola "Vrhbosna" (67 učenika), "Mula Mustafa Bašeskija" (78 učenika), "Šejh Muhamed ef. Hadžijamaković" (83 učenika) i „Saburina“ (52 učenika) imali su obezbijeđen prevoz.



Nagrade za najuspješnije studente iz Starog Grada

Općina Stari Grad je nastavila sa lijepom praksom, a to je da novčano nagradi i javno pohvali studente iz Starog Grada koji su dobili najviša priznanja Univerziteta u Sarajevu – zlatne i srebrene značke, za izuzetne rezultate i vrlo visok prosjek ocjena za vrijeme prvog ili drugog ciklusa studija. Diplome i novčane nagrade je dobilo 10 studenata:

Ena Muhić (Pravni fakultet, prosjek ocjena 9,53 – Zlatna značka), Nejra Memedi (Filozofski fakultet, prosjek ocjena 9,94 – Zlatna značka), Amna Pezo (Fakultet zdravstvenih studija, prosjek ocjena 9,38 – Srebrene značka), Dženana Tatlić (Šumarski fakultet, prosjek ocjena 9,34 – Srebrene značka), Kamber Kamberi (Fakultet islamskih nauka, prosjek ocjena 9,31 – Srebrene značka), Aida Adžović (Muzička akademija, prosjek ocjena 9,20 – Srebrene značka), Anes Gugić (Fakultet političkih nauka, prosjek ocjena 9,17 – Srebrene značka), Lamija Vrnjak (Elektrotehnički fakultet, prosjek ocjena 9,16 – Srebrene značka), Nejra Hadžić (Pedagoški fakultet, prosjek ocjena 9,16 – Srebrene značka), Amina Kadrić (Medicinski fakultet, prosjek ocjena 9,02 – Srebrene značka).

Stipendiranje učenika i studenata

Općina Stari Grad je u školskoj 2020/21. godini stipendirala ukupno 346 učenika i studenata, a iznos koji je za te namjene izdvojen iz budžeta je 312.000 KM. Služba za boračko-invalidsku i socijalnu zaštitu provela je javni konkurs za stipendiranje djece šehida - poginulih boraca, ratnih vojnih invalida i demobilisanih boraca u školskoj 2020/2021., a pravo na stipendiranje ostvarila su 222 korisnika stipendija iz navedenih kategorija.

Stipendije za nadarene učenike i studente dobilo je 119 korisnika, a za te namjene izdvojeno je 106.000 KM. I pored smanjenog priliva sredstava u općinski budžet, odlukom općinskog načelnika Ibrahima Hadžibajrića, stipendije su ostale na istom nivou kao i prethodnih godina i nisu dovedene u pitanje. Štaviše, svi nadareni učenici i studenti koji su aplicirali i ispunili uslove, dobili su stipendije, pa je osigurano i dodatnih 6.500 KM.

Podijeljene su i stipendije učenicima iz Starog Grada koji su se odlučili za deficitarna zanimanja kao što su: keramičar, podopolagač, tapetar, mesar itd. Stipendirano je 7 učenika. Ovi učenici dobili su stipendije kako bi im se pomoglo u školovanju, ali istovremeno podstaklo i druge mlade ljude da se bave zanatima, posebno starim, tradicionalnim.



Briga za socijalno ugrožene kategorije

Putem Službe za boračko-invalidsku i socijalnu zaštitu iz Budžeta za 2021. godine za period od 01.01.2021. godine do 31.12.2021. godine za jednokratne novčane pomoći za lica u stanju socijalne potrebe, izdvojeno je 91.350 KM, a pomoć su dobile 703 osobe.

Što se tiče lica oboljelih od teških ili težih oboljenja (onkološki pacijenti, teški oblik dijabetesa, leukemija, bolesti pluća praćene trajnim oštećenjima, plućna embolija, autizam, srčani i moždani udar i sl.), te za nastavak liječenja u inostranstvu, u pomenutom periodu je podneseno 198 zahtjeva za liječenje istih i isplaćen iznos od 62.100 KM.

Ove godine je za 17 bračnih parova koji su se obratili za pomoć Općinskom načelniku za sufinansiranje troškova vantjelesne oplodnje isplaćen iznos od 21.000 KM.

Odlukom o vidovima socijalne zaštite koji se finansiraju iz Budžeta Općine Stari Grad Sarajevo kao vid pomoći stanovništvu predviđena je i isplata sredstava za nabavku ogrjeva te je za 67 podnosilaca zahtjeva isplaćen iznos od 18.400 KM.

Za pomoć u liječenju od bolesti celijakija, za koje je planiran grant u općinskom budžetu, obratilo se 25 lica kojima je isplaćeno oko 6.200 KM. U istom periodu je za pomoć u liječenju paraplegičarima isplaćeno oko 7.200 KM.

Ni u ovoj godini nisu izostale tzv čestitke za porodilje. Isplaćena su sredstva u iznosu od 90.300 KM za 276 porodilja, sa prebivalištem na području općine Stari Grad Sarajevo. Ove godine se desio i jedan kuriozitet. U ponedjeljak, 04. oktobra, u 12:19 sati, jedinstveni dispečerski centar Hitne pomoći (124) primio je poziv da se žena porađa u automobilu koji je zaustavljen na tramvajskoj stanici kod Katedrale. Za rekordne dvije minute dežurna medicinska ekipa iz punkta Hitne pomoći Stari Grad, predvođena dr. Kemalom Kadrićem, stigla je na lice mjesta. Po njihovom dolasku žena se već porodila u automobilu, presijekli su pupčanu vrpcu i odmah zbrinuli majku i njeno zdravo žensko dijete otpremivši ih u bolnicu. Općinski načelnik mr Ibrahim Hadžibajrić uputio je mladoj majci poklone i čestitku.



Podrška projektima i institucijama



Za obnovu prostorija Opće bolnice izdvojeno 11.000 KM

Općinski načelnik mr Ibrahim Hadžibajrić i direktor JU Opća bolnica "Prim. dr. Abdulah Nakaš" prof. dr. Ismet Gavrankapetanović potpisali su ugovor o namjenskom grantu na osnovu kojeg se iz budžeta Općine Stari Grad izdvojilo 11.000 KM za ovu ustanovu. Sredstva su usmjerena za renoviranje i opremanje prostorija predviđenih za svakodnevne sastanke i obavljanje dijela administrativnih poslova vezanih za liječenje pacijenata Odjeljenja za internu medicinu. U julu 2020. godine, u jeku pandemije korona virusa načelnik Ibrahim Hadžibajrić također je posjetio Opću bolnicu „Prim dr Abdulah Nakaš“ i uručio prof dr Gavrankapetanoviću, direktoru ove ustanove, odluku o dodjeli novčanih sredstava u iznosu od 10.000 KM za borbu protiv korona virusa.



Redovna i dodatna podrška Roditeljskoj kući u Sarajevu

Općinski načelnik mr Ibrahim Hadžibajrić i predsjednik Udruženja 'Srce za djecu oboljelu od raka' Fikret Kubat potpisali su početkom marta ugovor o podršci radu Roditeljske kuće u Sarajevu, uvećan na 15.000 KM za ovu godinu. Podrška Udruženju "Srce za djecu oboljelu od raka" i Roditeljskoj kući traje od 2016. godine. a ove godine je ona bila viša nego ikad. Naime, zbog otkazivanja novogodišnjeg dočeka u Sarajevu, općinski načelnik Hadžibajrić preusmjerio je sredstva za te namjene, u iznosu od 10.000 KM, za pomoć Roditeljskoj kući. Ugovor o usmjeravanju sredstava potpisan je 15. decembra. Kroz budžet Općine Stari Grad za podršku radu Roditeljske kuće dosad su izdvojena sredstva u iznosu višem od 50.000 KM.

“Ime jednog roditelja” umjesto “Ime oca” na svim formularima u Općini Stari Grad

Svi formulari u Općini Stari Grad promijenjeni su tako što je izbrisana formulacija „Ime oca“, a umjesto nje uneseno „Ime jednog roditelja“. Općina Stari Grad prva je jedinica lokalne samouprave u FBiH koja je izvršila korekciju svih formulara i obrazaca za korisnike. Općinski načelnik mr Ibrahim Hadžibajrić je prihvatio inicijativu Udruženja “Zaboravljena djeca rata” s ciljem zaustavljanja diskriminacije nad djecom rođenom usljed posljedica ratnog silovanja. Inicijativa “Ime jednog roditelja” zalaže se da se na nivou cijele FBiH omogući jednolikost zvanične dokumentacije koju koriste svi građani FBiH, a koji će biti u skladu sa deklaracijom o ljudskim pravima, međunarodnim i domaćim zakonima.



Sarajevo Film festival u Starom Gradu: Ljetno kino na višenamjenskom trgu

Načelnik Općine Stari Grad Ibrahim Hadžibajrić i direktor Sarajevo Film Festivala Mirsad Purivatra u augustu tekuće godine potpisali su ugovor o saradnji na realizaciji projekta Ljetno kino Stari Grad, te je Općina Stari Grad dobila svoju prvu zvaničnu festivalsku lokaciju na višenamjenskom trgu prekoputa Vijećnice. Ljetno kino Stari Grad u okviru SFF-a, održano je od 13. do 20. augusta ove godine, a posjetile su ga stotine građana i ljubitelja filma. Ljetno kino Stari Grad ugostilo je oskarovca i dobitnika Počasnog Srca Sarajeva reditelja Wima Wendersa, zatim oskarovca Danisa Tanovića, rediteljku Jasmilu Žbanić, glumca Izudina Bajrovića, glumicu i predsjednicu žirija Takmičarskog programa SFF-a Jasnu Đuričić, reditelja i glumca Dragana Bjelogrića, muzičara i kompozitora Željka Joksimovića, folk divu Hanku Paldum i mnoge druge.



Podrška talentovanim mladim ljudima i sportskim kolektivima



Nova puška za državnu rekorderku Almedinu Arnautović

Almedina Arnautović, članica Streljačko-streličarskog kluba „Željezničar“ državna je rekorderka u gađanju vazдушnom puškom na deset metara u kategoriji seniorki. Za brojna takmičenja na koja je išla, Almedina je koristila opremu koja nije zadovoljavala ni minimum uslova za ulazak na međunarodnu scenu gdje se ne dozvoljava nastup sa puškom starijom od deset godina. Puška koju je koristila naša državna rekorderka stara je 19 godina. Saznavši za ove probleme, općinski načelnik mr Ibrahim Hadžibajrić naložio je hitnu kupovinu nove puške koja je ovoj rekorderki zvanično uručena u oktobru ove godine.



Podrška za reprezentativca u alpskom skijanju Dinu Terzića

Dino Terzić, 21-ogodišnji mladi momak sa Bistrika, koji je prvi put stao na skije kada je imao svega godinu dana, danas je reprezentativac Bosne i Hercegovine u alpskom skijanju i niže uspjeh za uspjehom. On je još jedan u nizu mladih ljudi koji je dobio podršku općinskog načelnika mr Ibrahima Hadžibajrića na svom putu do cilja. Na državnom prvenstvu Ujedinjenih Arapskih Emirata Dino je osvojio zlatnu medalju u disciplini slalom. Osim zlatne medalje, Terzić se u Dubaiu okitio i sa srebrenom, te bronzanom, tačnije osvojio je prvo, drugo, treće i četvrto mjesto u različitim utrkama. Odlukom općinskog načelnika mr Ibrahima Hadžibajrića, Općina Stari Grad u potpunosti je finansirala troškove odlaska na ovo takmičenje.

Nagrade za stonotenisere Enru Subašić i Arona Kanlića

Enri Subašić i Aronu Kanliću, uspješnim stonoteniserima, članovima Stonoteniskog kluba SPIN 2012, koji su svojim odličnim nastupima osigurali mjesto u Stonoteniskoj reprezentaciji BiH i međunarodnim takmičenjima načlenik Hadžibajrić uručio je zahvalnice i novčane nagrade, a Općina je finansijski podržala njihov odlazak na Evropsko prvenstvo u Varaždin.



Podrška za karatistkinje Edinu, Eminu i Nejru Sipović

Članice Karate kluba „Ippon“, sestre Edina, Emina i Nejra Sipović, koje su Svjetskoj ligi za mlade, osvojile jednu srebrnu i dvije bronzane medalje također su dobile priznanje i nagrade općinskog načlenika. Osim toga, finansiran je odlazak Nejre Sipović na Evropsko prvenstvo u Finskoj gdje je osvojila je drugo mjesto, te tako postala viceprvakinja Evrope u karateu.



Hajrudin Herak uspješni kadet Turske vojne akademije

Kao lokalna zajednica ponosni smo na svaki uspjeh mladih ljudi koji su rođeni, odrasli i školovali se upravo ovdje, u Starom Gradu. Posebno se ponosimo onima koji su u životu postavili visoke ciljeve i odlučili da ih po svaku cijenu ostvare, pa makar to značilo i da će na neko vrijeme napustiti ovu zemlju i obrazovati se daleko u svijetu. Upravo takav je i dvadesetogodišnji Hajrudin Herak, mladi momak sa Bistrika, jedini Sarajlija koji je prije dvije godine uspješno položio sve potrebne testove i ispunio uslove za prijem na Tursku vojnu akademiju. Načelnik Hadžibajrić je primio Hajrudina i čestitao mu na njegovom uspjehu i zalaganju, te istakao da se lokalna zajednica ponosi ovakvim mladim ljudima koji su možda i najbolji ambasadori i predstavnici Starog Grada u svijetu.



Priznanje za Fatiha Žgalja

Na 51. Međunarodnoj olimpijadi iz fizike, čiji je organizator bila Litvanija, učenici nisu putovali u državu domaćina nego su eksperimentalne i teorijske zadatke radili u prostorijama Richmond Park School na Ilidži. Bosna i Hercegovina je na Olimpijadi imala pet predstavnika, a Fatih Žgalj, predstavnik naše Općine, osvojio je bronzanu medalju. Načelnik Hadžibajrić uručio je Fatihu zahvalnicu za njegove rezultate.

Pružena je finansijska potpora sportskim kolektivima iz Starog Grada, Karate klubu "Bašćaršija" i Fudbalskom klubu "Vratnik". Općina Stari Grad u 2021. godini podržala je značajne sportske događaje poput "Two Cities Marathon - Sarajevo i Istočno Sarajevo" i tradicionalne skokove „Bentbaša Cliff diving 2021".



Aleja ambasadora - 14 novih lipa

Nakon više od godinu pauze, koju je uzrokovala pandemija korona virusa, Općina Stari Grad od septembra je ponovo nastavila sa tradicijom sadnje lipa u poznatoj šetnici Aleji ambasadora. u 2021. Godini lipe je zasadilo 14 ambasadora:

Nj.e.Ivana Hlavsová (ambasadorica Republike Češke), nj.e. Makoto Ito (ambasador Japana), nj.e. Jan Waltmans (ambasador Kraljevine Nizozemske), nj.e. Olav Reinertsen (Kraljevina Norveška), nj.e. Damijan Sedar (Republika Slovenija), nj.e. Anton Păcurețu (Rumunija), nj.e. Roem Kono (Republika Indonezija), nj.e. Raja Saifful Ridzuwan (Malezija), nj.e. Bojana Urumova (šefica Ureda Vijeća Evrope), nj.e.Sadik Babur Girgin (Republika Turska), nj.e. Christine Toudic (ambasadorica Republike Francuske), nj.e. Akhtar Jamil Rao (ambasador Islamske Republike Pakistan), nj.e. Lineu Pupo De Paula (ambasador Federativne Republike Brazil) i nj.e.Dimitrios Papandreou (ambasador Grčke).



Ambasadori Reinertsen, Păcurețu i Sedar dobili certifikate o sadnji



Ekselencije Ito, Waltmans i Hlavsová



Ambasador Turske Sadik Babur Girgin

Bratimljenja sa drugim općinama

Općina Stari Grad, poznata po velikom broju pobratimskih općina iz svih krajeva svijeta, od ove godine je bogatija za još dvije pobratimske općine. Riječ je o dvije općine iz glavnog grada Republike Sjeverne Makedonije, Skopja. Polovinom septembra potpisan je sporazum o bratimljenju sa najstarijom općinom u Skoplju, Opštinom Čair, koja, kao i Stari Grad, predstavlja kulturno-historijsko jezgro svog grada. U ime Opštine Čair, Sporazum je potpisao načelnik Visar Ganiu. Općina Stari Grad se potom bratimila i sa jednom od najurbanijih općina u Skoplju-Opštinom Aerodrom koja se prostire na površini od 20 km2 i ima oko 72.000 stanovnika. U ime Opštine Aerodrom Sporazum o bratimljenju i saradnji potpisao je šef kabineta Aleksandar Gjorgievski. U ime Općine Stari Grad sporazume je potpisao općinski načelnik mr Ibrahim Hadžibajrić. Općina Stari Grad trenutno ima potpisane sporazume o bratimljenju i saradnji sa 27 općina i gradova iz regiona i svijeta



Delegacije Općine Stari Grad Sarajevo i Opštine Čair



Bratimljenje sa Opštinom Čair, Skopje



Potpisivanje sa Opštinom Aerodrom

Inspekcijski nadzor

Služba za opću upravu i inspekcijske poslove- Odsjek za inspekcijske poslove u 2021. godini je proveo inspekcijske nadzore, uključujući i nadzor komunalnih redara, i to :

- u komunalnoj oblasti 1.433 nadzora
- u oblasti građenja 1.124 nadzora
- u cestovnoj oblasti 130 nadzora

Nakon izvršenih inspekcijskih nadzora, u skladu sa zakonskim propisima, pokrenuti su inspekcijski postupci i doneseni upravni akti, kojim su prekršiocima naložene odgovarajuće upravne mjere.

U navedenom periodu donoseno je:

- 145 rješenja o rušenju
- 61 rješenje o otklanjanju opasnosti
- 310 rješenja o uklanjanju sa javnih površina.

Inspektori su nelegalne investitore sankcionisali novčanim kažnjavanjem izdavanjem prekršajnih naloga i zaključaka o dozvoli prisilnog izvršenja rješenja sa novčanim kažnjavanjem.

Ukupan novčani iznos po izdatim prekršajnim nalogima, a na osnovu Zakona o prostornom uređenju (Službene novine KS broj 24/17 i 1/18) i Zakona o inspekcijama (Službene novine KS, broj 2/17) iznosi 196.900.00 KM, a navedena novčana sredstva imajući u vidu nivo vlasti koji je donio propise po kojim je inspektor odlučivao, pripadaju, odnosno uplaćuju se u korist budžeta Kantona Sarajevo.

Ukupan novčani iznos po izdatim prekršajnim nalogima, za prekršaje propisane općinskim Odlukama iznosi 153.400,00 KM, a ova sredstva su prihod, odnosno ista se uplaćuju u korist budžeta Općine Stari Grad Sarajevo.

Ukupan iznos po izdatim prekršajnim nalogima u 2021. godini je 350.300.00 KM.

Općina Stari Grad je, putem nadležne Službe za opću upravu i inspekcijske poslove, u 2021. godini provela opsežne aktivnosti na uklanjanju bespravno postavljenih reklamnih sadržaja na području ove lokalne zajednice. Cilj je spriječiti nezakonito postavljanje reklamnih sadržaja, kao i očuvati ugled i izgled građevina uže starogradske jezgre i spriječiti njihovo skrnavljenje neprimjerenim sadržajima.

Uklonjena su 22 slobodnostojeća reklamna panoa, 40 fasadnih reklama i 4 bankomata.



Rad sa strankama u šalter sali

Uposlenici Matičnog ureda, pri Šalter sali Općine Stari Grad Sarajevo u 2021. godini izvršili su 1.361 upis, od toga u Matičnu knjigu rođenih 409 upisa, Matičnu knjigu državljana 3 upisa, Matičnu knjigu vjenčanih 287 upisa i Matičnu knjigu umrlih 662 upisa.

Putem pisarnice zaprimljeno je 16.700 zahtjeva stranaka, 6.000 predspisa (upotpune dokumentacije, žalbe, mišljenja i sl.), dok je putem pošte od strane ovog organa otpremljeno 22.500 preporučenih i običnih pošiljki.

Također, u okviru ovog izvještajnog perioda arhivirano je 16.800 predmeta.

Pravo na slobodan pristup informacijama, u skladu sa pozitivnim zakonskim odredbama, ostvarilo je 615 stranaka.

Putem šaltera ovjere, od strane ovlaštenih uposlenika, izvršeno je 399.756 usluga ovjere prepisa i legalizacije potpisa, te 324 usluge legalizacije potpisa na terenu za stara, bolesna, invalidna i nepokretna lica.



Rad sa strankama putem mjesnih zajednica

Sekretari 16 mjesnih zajednica Općine Stari Grad Sarajevo, u toku 2021. godine primili su ukupno 15.627 stranaka, organizovali 17 zborova građana, te 38 sastanaka Savjeta mjesnih zajednica. Kompletan izvještaj o radu mjesnih zajednica dostupan je u tabelarnom prikazu:

R/br	Mjesna zajednica	Prijem stranaka	Izlasci na teren	Upućeni dopisi	Prijava u MZ	Odjava iz MZ	Potvrde	Kućne liste	Sastanak Savjeta	Sastanci PS	Zborovi građana
1)	Babića bašča	862	209	106	0	2	13	52	0	1	3
2)	Bašćaršija	1460	375	10	0	0	0	22	11	0	1
3)	Bistrik	1213	208	137	7	1	41	94	1	51	1
4)	Ferhadija	43	187	40	0	0	0	14	0	0	0
5)	Hrid-Jarčedoli	880	159	46	6	5	29	51	2	0	2
6)	Kovači	540	179	61	0	0	5	29	0	2	2
7)	Logavina	638	134	36	1	0	0	47	0	6	0
8)	Mahmutovac	1081	243	92	2	1	3	65	0	9	1
9)	Medrese	2983	203	137	0	1	3	86	0	4	1
10)	Mjedenica	1217	350	28	0	0	0	28	11	0	1
11)	Moščanica	1593	206	101	22	0	69	86	2	8	1
12)	Sedrenik	1047	194	96	12	14	11	117	0	3	3
13)	Sumbuluša	334	143	101	0	0	2	33	10	0	0
14)	Širokača	555	120	32	0	0	7	51	0	0	0
15)	Toka-Džeka	278	203	26	0	0	4	63	0	0	0
16)	Vratnik	903	162	109	3	1	14	130	1	1	1
	UKUPNO :	15627	3275	1158	53	25	201	968	38	85	17

Obilježavanja značajnih datuma Protokolarne aktivnosti

Dan nezavisnosti Bosne i Hercegovine

Dan nezavisnosti Bosne i Hercegovine u općini Stari Grad simbolično je obilježen sadnjom stabla na mjestu gdje je na ovaj dan 2020. godine održana velika svečanost i ozvaničen završetak četiri kapitalna projekta Općine Stari Grad. Tog dana otvorena je prva javna podzemna garaža i najveći višenamjenski trg u Kantonu Sarajevo. Na višenamjenskom trgu stablo je zasadio načelnik Hadžibajrić u društvu mladih ljudi koji predstavljaju ponos ove lokalne zajednice. U simboličnom činu sadnje stabla načelniku Hadžibajriću pridružili su se Hamza Turulja osvajač srebrne medalje u karateu na svjetskom prvenstvu u Čileu u najbolji mladi sportista Bosne i Hercegovine u 2020. godini, zatim Lamija Vrnjak, studentica Elektrotehničkog fakulteta u Sarajevu s prosjekom ocjena 9,16 zbog čega joj je pripala 'srebrna značka' Univerziteta u Sarajevu i Samir Mirvić, član KUD Bašćaršija, najpoznatijeg i najrepresntativnijeg kulturno-umjetničkog društva.





Dan Općine Stari Grad, 02.maj

Povodom Dana Općine Stari Grad, 02.maja, učenjem Fatihe i polaganjem cvijeća odata je počast utemeljitelju Sarajeva Isa-begu Ishakoviću, najvećem vakifu grada Gazi Husrev-begu, najboljim sinovima koji leže na Šehidskom mezarju Kovači i rahmetli predsjedniku RBiH Aliji Izetbegoviću. Poslije više od 25 godina od njegovog razaranja tokom agresije na ovaj grad, svečano je otvoren i rekonstruisani vrtić "Bulbuli" na Bistriku. Općina Stari Grad upriličila je otvaranje vrtića na jedan od najznačajnijih datuma u historiji ove lokalne zajednice, 02. maj, Dan Općine.



Dan državnosti Bosne i Hercegovine

Dan državnosti Bosne i Hercegovine u Starom Gradu obilježen je nizom manifestacija koje je Općina Stari Grad organizovala kako bi se istakla važnost ovog značajnog datuma za sve građane naše domovine. Delegacija Općine Stari Grad Sarajevo, predvođena općinskim načelnikom mr Ibrahimom Hadžibajrićem odala je počast polaganjem cvijeća i učenjem Fatihe na spomen obilježjima i Šehidskom mezarju Kovači. Osim toga, u čast Dana državnosti Bosne i Hercegovine Općina Stari Grad sa Udruženjem Pomozi.ba organizovala je svečani ručak za korisnike Restorana dobre volje smještenog u Starom Gradu. Općinski načelnik mr Ibrahim Hadžibajrić, sekretarka organa državne službe mr Alma Destanović kao i svi pomoćnici općinskog načelnika i v.d.općinskog pravobranioca volontirali su u ovom udruženju dijeleći obroke korisnicima.

Nakon toga, uz pjesmu, osmijehe i bogatu kulturnu baštinu koju čuvaju i predstavljaju članovi KUD-a Bašćaršija, nastavljena je proslava Dana državnosti Bosne i Hercegovine sa građanima. Organizovan je defile članova KUD-a kroz Ferhadiju i Sarače do Sebilja, a pridružili su im se općinski načelnik, njegovi saradnici, općinski vijećnici i građani. Defile je uz tradicionalne sevdalinke koje su izvodili članovi KUD-a Bašćaršija, praćeni aplauzima i odobravanjem brojnih građana stigao do Sebilja gdje je nastavljen program, a Općina Stari Grad je sve prisutne počastila kafom i čajem.





Godišnjica masakra na Markalama i Dan sjećanja na ubijene građane

Povodom Dana Općine Stari Grad, 02.maja, učenjem Fatihe i polag-Delegacija Općine Stari Grad, predvođena općinskim načelnikom mr Ibrahimom Hadžibajrićem, 05.februara učestvovala je u protokolu obilježavanja godišnjice masakra na Markalama i Dana sjećanja na ubijene građane. Pored načelnika Hadžibajrića, na spomen-obilježju na pijaci Markale proučili su Fatihu i položili cvijeće predsjedavajući Općinskog vijeća dr.sc. Mirza Batalović, pomoćnica načelnika za boračko-invalidsku i socijalnu zaštitu Safija Šehović, kao i savjetnik općinskog načelnika Samir Muhić.





Obilježena 18. godišnjica smrti prvog predsjednika RBiH

Na Šehidskom mezarju Kovači obilježena je 18. godišnjica smrti prvog predsjednika međunarodno priznate države Republike Bosne i Hercegovine, Alije Izetbegovića. Delegaciju Općine Stari Grad predvodio je općinski načelnik mr Ibrahim Hadžibajrić, a činili su je i v.d. općinskog pravobranioca Enes Smajlović, pomoćnik načelnika za investicije i komunalne poslove Adis Hadžović i vijećnik u Općinskom vijeću Stari Grad Sarajevo Adi Zahiragić (SDA).



Posjeta Memorijalnom centru Potočari

Uz poruke da Srebrenica nije samo 11. juli i da se žrtve nikada ne smiju zaboraviti, te da je obaveza živih da ne dozvole da prošlost ikada bude zaboravljena, općinski načelnik mr Ibrahim Hadžibajrić sa saradnicima i nosiocima najviših ratnih priznanja - Zlatnih ljiljana i Zlatnih policijskih znački iz Starog Grada, posjetili su 10. septembra Memorijalni centar Potočari i odali počast žrtvama genocida. Prethodno su članovi Udruženja najviših ratnih priznanja Stari Grad posjetili mezarja u Bratuncu i Vlasenici gdje su također proučili Fatihu i položili cvijeće.



Međunarodni dan starijih osoba

U parku At Mejdani, u organizaciji Centra za promociju i unapređenje zdravlja „Generacija“, 01. Oktobra obilježen je Međunarodni dan starijih osoba. Događaj je organizovan kako bi se iskazala čast i poštovanje kao i briga za osobe treće životne dobi, s ciljem isticanja važnih doprinosa starijih osoba u društvu i podizanja svijesti o problemima i izazovima starenja. Tim povodom načelniku Ibrahimu Hadžibajriću je uručena zahvalnica u ime Udruženja „Generacija“ za pomoć i kontinuiranu podršku koju pruža ovom Udruženju od samog nastanka.



Međunarodni dan osoba sa invaliditetom

Prema zvaničnim podacima, u svijetu je oko 240 miliona djece sa smetnjama u razvoju, a obaveza društva je pružiti im priliku da ostvaruju svoj puni potencijal, te da budu angažovani u svojim zajednicama. Upravo iz tog razloga, a povodom Međunarodnog dana osoba sa invaliditetom, načelnik Općine Stari Grad mr Ibrahim Hadžibajrić štićenicima Zavoda Mjedenica omogućio je 03.12. jednodnevni rad u Općini Stari Grad. Štićenici Zavoda Mjedenica angažovani su u Šalter sali Općine Stari Grad, a za njihov rad su im isplaćene dnevnice. Povodom Međunarodnog dana osoba sa invaliditetom, načelnik Hadžibajrić posjetio je Servis centar „Dajte nam šansu“ koji na području općine Stari Grad djeluje od 2017. godine, te okuplja roditelje i djecu sa poteškoćama u razvoju. Prilikom posjete dogovorena je dodjela godišnjeg granta za režijske troškove ovog servisa u iznosu od 10.000 KM



Pomoć povratničkim porodicama u Srebrenici

Općinski načelnik mr Ibrahim Hadžibajrić posjetio je krajem godine povratničke porodice u Potočarima i okolnim selima, kao i Prvu osnovnu školu Srebrenica za koju je ranije izdvojeno 7.000 KM za popravku grijanja kako učenici ne bi boravili u hladnim učionicama. Za ovu školu bit će izdvojeno još 10.000 KM za pomoć u rješavanju problema sa vlagom u učionicama. U školi se načelnik susreo i sa povratničkim porodicama iz sela Osat i Osmače, razgovarao sa njima i raspitivao se u kakvim uslovima žive i šta im je potrebno. Porodicama su uručeni paketi sa prehrambenim artiklima, a mališanima novogodišnji paketići. Nakon toga organizovana je posjeta selu Žutica gdje je načelnik Hadžibajrić posjetio povratničke porodice iz sela Žutica i Sućeska, uručio im pakete i novogodišnje paketiće mališanima.



Posjeta majkama iz Srebrenice koje žive same

Načelnik Hadžibajrić iskoristio je posjetu da obiđe i majke iz Srebrenice Nuru Mustafić i Refiju Hadžibulić koje su izgubile sinove, muževe i danas žive potpuno same u Srebrenici. "Vratile smo se ovdje 2000. godine. Sve je bilo srušeno. Izgradile smo kuće u znak sjećanja na našu ubijenu djecu," ispričale su ove hrabre majke. "Sad smo same, a trebale bi imati unuke. Teško nam je. Provodimo dane jedna sa drugom. Kod jedne prenoćimo, a kod druge ručamo i večeramo, i tako...". Nura je u Srebrenici izgubila tri sina i muža, a Refija jednog sina. I pored svega vratile su se na svoja ognjišta gdje čuvaju uspomenu na svoje najmilije. Načelnik Hadžibajrić je proveo poslijepodne s ovim hrabrim majkama, posvetio im svoje vrijeme i pozvao da mu se obrate za svaku vrstu pomoći.

NAGRADE I PRIZNANJA

Načelnik Hadžibajrić dobitnik Jubilarne nagrade za životno djelo

Općinski načelnik mr Ibrahim Hadžibajrić početkom 2021. godine dobio je Jubilarnu nagradu za životno djelo za izvanredne rezultate u razvoju Općine Stari Grad i stvaranje ambijenta za biznis, doprinos afirmaciji općine, kontinuirano ulaganje u infrastrukturu i dugogodišnje prosperitetno vođenje Općine u interesu građana i biznisa.

Nagradu mu je dodijelio Evropski nezavisni žiri, sastavljen od uglednih evropskih i svjetskih menadžera, naučnih i javnih radnika, te ranijih dobitnika nagrade sa šireg prostora regiona. Ovu manifestaciju već godina-ma organizuje Agencija za izbor najmenadžera BiH, Jugoistočne i Srednje Evrope.



Općina Stari Grad najtransparentnija općina u Bosni i Hercegovini

Istraživanje otvorenosti 145 općina i gradova u Bosni i Hercegovini u 2021. godini, pokazalo je da je Općina Stari Grad Sarajevo četvrtu godinu zaredom najtransparentnija jedinica lokalne samouprave u BiH, sa porastom stepena ispunjenih indikatora na 73,40%. Istraživanje je i ove godine provedeno u okviru projekta Lokalni indeks otvorenosti Udruženja građana "Zašto ne" i inicijative Istinomjer. Također, kroz njihov projekat "Lokalne samouprave u BiH - Odgovornost i otvorenost u radu" izvršen je i monitoring ispunjenosti predizbornih obećanja načelnika i gradonačelnika u 15 jedinica lokalne samouprave nakon prve godine mandata, gdje je općinski načelnik mr Ibrahim Hadžibajrić postigao rezultat od 15% u odnosu na data obećanja. Od 13 kapitalnih i suštinskih projekata planiranih za period 2020-2024. godine, dva su u potpunosti realizovana, dok ih je pet u progresu.



Projekti i planovi za 2022. godinu

Ulaganje u obnovu i izgradnju kvalitetne infrastrukture i dalje predstavlja jedan od osnovnih ciljeva u djelovanju ove lokalne zajednice, predvođene općinskim načelnikom mr Ibrahimom Hadžibajrićem. U godini koja je pred nama planirani su značajni projekti koji će doprinijeti razvoju ove lokalne samouprave, a istovremeno omogućiti bolji kvalitet života za građane. Nabrojat ćemo neke od njih:

Zgrada za smještaj djece bez roditelja i socijalno ugroženih

U 2022. godini u planu je početak izgradnje još jedne zgrade za smještaj djece bez roditelja i socijalno ugroženih porodica. Bit će to četvrta zgrada koju će Općina Stari Grad sagraditi za najugroženije kategorije stanovništva čime će im riješiti jedno od najvažnijih životnih pitanja, a to je krov nad glavom. Kako je najavio načelnik Hadžibajrić, ova zgrada gradit će se kao zajednički projekat Općine Stari Grad i Fondacije Hemiias, čiji je osnivač ugledni privrednik i veliki humanista Hajriz Brčvak, porijeklom iz Bijelog Polja. Zgrada za jetime (djecu bez roditelja) i socijalno ugrožene porodice gradit će se na zemljištu u ulici Čadordžina, u mjesnoj zajednici Logavina. Po završetku, objekat će biti uknjižen na Općinu Stari Grad i bit će trajno vlasništvo Općine kupovinu nove puške koja je ovoj rekorderki zvanično uručena u oktobru ove godine.







Trg Oslobođenja - Alija Izetbegović - nastavak projekta


Čim se steknu vremenski uslovi nastavit će se obnova i uređenje Trga oslobođenja-Alija Izetbegović. Projektom je očuvano sadašnje rješenje Trga, autora Vladimira Dobrovića i Sakiba Hadžihalilovića iz 1976.godine. Predviđeno je novo popločanje kamenim pločama, svijetle boje, debljine 8 cm, dok se s ciljem naglašavanja dijelova Trga planiraju iskoristiti tamnije granitne ploče uz ivičnjake i ispod klupa, tj na mjestima gdje nema mogućeg većeg opterećenja. Odabrana je kvalitetna vrsta i boja kamena za popločavanje koja neće uticati na likovni izraz Trga. Predviđeno hortikulturno uređenje u potpunosti uvažava Trg kao spomenik prirodnog naslijeđa, zadržavajući postojeću vegetaciju, uz obogaćivanje zelenih površina novim vrstama.





Muzej 'Mersad Berber' - nastavak projekta

Ovaj projekat je Općina Stari Grad najavila je i počela 2019. godine, a muzej će se nalaziti u ulici Zelenih beretki, u prostoru veličine 450 metara kvadratnih koji Općina ustupa za potrebe muzeja. Općinsko vijeće Stari Grad je, na prijedlog općinskog načelnika mr Ibrahima Hadžibajrića, u januaru 2019. godine usvojilo odluku o izdvajanju sredstava u iznosu od 300.000 KM za ovaj projekat, a od sredstava ostvarenih prodajom poslovnih prostora. Iste godine pristupilo se realizaciji radova koji su obustavljeni kada se pokazalo da će rekonstrukcija i adaptacija postojećih prostorija biti dosta kompleksnija od prvobitne zamisli, te je trebalo osigurati i dodatna sredstva. U budžetu Općine Stari Grad Sarajevo za 2022. godinu planirana su sredstva u iznosu od 300.000 KM za nastavak ovog projekta dok će Grad sarajevo izdvojiti dodatnih 300.000 KM kako bi se nastavila njegova realizacija. Izgradnjom ovog muzeja, djela Mersada Berbera će, poput brojnih muzejskih, galerijskih i privatnih kolekcija širom svijeta, konačno imati svoje mjesto i u Sarajevu.





Objekat na Darivi uz Park mira

Općina Stari Grad Sarajevo nastavlja aktivnosti na unapređenju turističko-rekreativne ponude na prostoru Darive kako bi ovo popularno starogradsko izletišta bilo obogaćeno dodatnim zabavnim i infrastrukturnim sadržajima. Još u 2021. godini uz igralište Park mira planirana je izgradnja objekta koji bi bio potpuno uklopljen u ambijentalnu cjelinu i gradio se na površini od oko 100 metara kvadratnih. Realizaciju je usporilo nepostojanje vodovodne infrastrukture na ovom dijelu, te se u prošloj godini pristupilo iznalaženju rješenja i izradi još jednog projekata za vodovodnu mrežu od Bentbaše do Darive. I ovaj projekat je završen i sada se čeka građevinska dozvola kako bi se pristupilo njegovoj realizaciji. Objekat će se sastojati od ženskog i muškog toaleta, toaleta za invalidna lica, prostorije za presvlačenje beba, manje trgovine, te ostave i pomoćne prostorije. Trgovina će biti manjih gabarita predviđena za prodaju sokova, vode, sladoleda itd.





Utopljanje OŠ “Edhem Mulabdić”

Centralni objekat OŠ „Edhem Mulabdić”, sagrađen prije više od 130 godina, u 2022.godini dobit će novu fasadu i prozore čime će se izvršiti utopljanje objekta. Sporazum o saradnji na utopljanju objekta potpisali su u julu 2021. godine općinski načelnik mr Ibrahim Hadžibajrić, ministrica za odgoj i obrazovanje KS Naida Hota Muminović i direktorica OŠ “Edhem Mulabdić” Amela Avdić. Projekat je vrijedan oko 307.000 KM koje će izdvojiti nadležno ministarstvo dok će Općina Stari Grad provesti proceduru izbora izvođača radova, nadzornog organa i realizovati projekat. Općina Stari Grad je za ovu školu sagradila modernu sportsku salu vrijednu oko 2 miliona KM, prije dvije godine.

Osim toga, s nadležnim ministarstvom potpisan je sporazum i za rekonstrukciju područne škole na Širokači vrijednu 200.000 KM, kao i sanaciju potpornog zida područne škole Bistrik –vrijednu 60.000 KM





Uvođenje rasvjete u tunel Vratnik na magistralnoj cesti M5 dionica: Šeherćehajin most – Korija

Na inicijativu Općine Stari Grad Sarajevo pokreće se projekat uvođenja javne rasvjete u tunelu Vratnik koji se nalazi na ulazu u Sarajevo. Ovaj tunel, na magistralnoj cesti M5 nikada nije bio osvijetljen od njegove izgradnje do danas. Neadekvatno osvijetljen predstavlja problem vozačima, a posebno pruža lošu sliku svima koji ulaze u grad iz ovog pravca. Projekat uvođenja savremene javne rasvjete koštat će 290.000 KM, a zajedno će ga finansirati JP ceste FBiH sa 130.000 KM; Grad Sarajevo sa 100.000 KM i Općina Stari Grad Sarajevo sa 60.000 KM.

Ulaganje u saobraćajnu i putnu infrastrukturu

U budžetu Općine Stari Grad za 2022. godinu planirana su sredstva za rekonstrukciju 30 saobraćajnica, te još 4 saobraćajnice koje bi trebale biti finansirane iz budžeta Kantona Sarajevo. Planirana je i izgradnja i sanacija 16 potpornih zidova, te 11 kaldrma, kao i rekonstrukcija komunalne infrastrukture na 7 lokacija. U ove radove bit će uloženo skoro 3 miliona konvertibilnih maraka.

Međuentitetska saradnja - sanacija puta Gornje Biosko

Općina Stari Grad Sarajevo i Opština Istočni Stari Grad su u prethodnim godinama zajednički realizovale brojne značajne projekte s ciljem unapređenja uslova življenja stanovnika: sanacija saobraćajnice Brusulje, sanacija lokalnog puta Hreša-Biosko, uvođenje rasvjete u selu Mešinovići i u Faletićima, sanacija puta Zlatište – Širokača, sanacija pristupnog puta Sarajevo - Pale do kamenoloma "Alpine", itd. Ove dvije općine, iz FBiH i RS-a, su jedinstven primjer dobre saradnje između dva entiteta, a ta saradnja nastavit će se i u 2022. godini. Ove dvije općine će zajedno realizovati projekat sanacije i asfaltiranja lokalnog makadamskog puta kroz selo Gornje Biosko u dužini od 1.500 km što će značajno olakšati uslove života za stanovnike oko 50 domaćinstava ovog sela. Projekat je vrijedan oko 156.000 KM i općine će ga finansirati u jednakim omjerima.



HVALA ZA PAŽNĚ